

四庫全書

集部

欽定四庫全書

集部
虛齋集卷一

詳校官中書臣賈鏊

中書臣劉源溥覆勘

覆校官編修臣汪鏞

校對官助教臣胡子襄

謄錄舉人臣吳之承

欽定四庫全書

集部六

虛齋集

別集類五

明

提要

臣等謹案虛齋集五卷明蔡清撰清字介夫
晉江人成化甲辰進士官至江西提舉副使
以守正忤寧王宸濠將中以罪謝病歸越數
月起為南京國子監祭酒未及上而卒萬厯
中賜謚文莊事蹟具明史儒林傳清初學主

於靜後主於虛謂天下之理以虛而入亦以
虛而應故自號虛齋成化間士大夫多空談
理學惟清薦實力行能不為訓詁支離所域
所著易蒙引四書蒙引諸書皆別著錄明史
藝文志載清所著虛齋文集五卷與此本合
清為學以窮理為主平生篤守朱子之說其
讀蜀阜存稿私計中謂朱陸俱宗孔孟而門
戶不同然陸學未盡符於大中至正之矩不

免為偏安之業其宗旨所在可以槩見及其
釋周易時於朱子之解意有未安者又多所
異同不為苟合是其識解通達與諸儒之膠
固執滯者不同故其文章亦純厚朴實言皆
有物雖不以藻彩見長而布帛菽粟之言殊
非雕文刻鏤者所可幾及至本傳稱清在吏
部因王恕訪以時事清上二札一請振紀綱
一薦劉大夏等三十餘人恕皆納用檢其文

並不見集中蓋編輯時已有遺佚而今不可考矣乾隆四十二年五月恭校上

總纂官臣紀昀臣陸錫熊臣孫士毅

總校官臣陸費墀

虛齋集原序

溫陵蔡介夫虛齋飾躬砥行動準古人其學以六經為
正宗四書為嫡傳四儒為真派平生精力盡用之易四
書蒙引之間闡發幽秘梓學宮而行天下其於易深矣
究性命之原通幽微之故真有以見夫天下之蹟象其
物宜天下之動通其典禮四方學士師宗之曰虛齋說
也守毋變扶衰振落溫陵造就可謂易學一時矣經義
趣深理到論策諸作暢達疏爽詩文別出體格掖人心

而繫名教卒澤於仁義道德粹如也貞剛善晦而亦間
取夫名者之忌在禮曹三原王端毅公引入為吏曹竟
復為禮曹乞南又乞告特起按察副使督學江西寧庶
人仇子因仇介夫介夫引而去逆瑾亂政起祭酒以鎮
壓人望而介夫先沒矣嗚呼介夫之不為鼂錯龜山非
韋耶景尚遺德姚英之諸君子為立祠葛石厓志貞為
輯遺文梓之一時交與予在也序其可辭夫有造道之
文有述事之文楊子雲曰商書灝灝爾周書噩噩爾後

世有作其雄視前人亦不為少矣卒之無足嗣往徽而
歆來聽又況移情役物越禮分而為者嗚呼邪說也贅
言也雅論也知斯三者可以定是文矣其不然文華作
氣質雅收聲而去道遠而昔後村序艾軒之文曰以言
語文字行世非先生意也介夫言語文字間哉介夫初
主於靜既又主於虛楊月湖方正曰主於靜是時理學
中輟二公竄永貞丁王夫江朝東崛起於曠鉤深索隱
二公殆獨得云正德辛巳夏仲道友見素林俊書于雲

莊青野

欽定四庫全書

虛齋集卷一

明 蔡清 撰

詩

自嘆

五十雖未老已知非少年欲將心事道祇恐付空言

題扇

風本造化權却從手中得因思天下事也須著人力

見武夷二首

日日問山水今日見武夷點頭一段意山靈知不知
泰山孔子登武夷朱子寓吾想萬山靈亦羨二山遇

別鄒汝愚謫雷州某所吏目五首

識君未三月別君遽萬里自疑非丈夫淚落不能止
識君未三月別君遽萬里終不為君恨天地有正氣
識君未三月別君遽萬里應思生才難莫負乾坤意此
行比遊學十年觀造詣炎荒無友生神交李伯紀
慷慨出門去默與千秋期飽喫惠州飯少和淵明詩

我觀古丈夫揮手構寰區節士非得已矧彼章句儒六籍垂世意豈為崇簡書心丹宜細煉為邦者如愚

哀鄒汝愚六首

天地元無情汝愚信死矣舉世嗤笑之吾獨不如爾
汝愚信死矣展轉淚沾襟一死未光明為君恨轉深
年少心更赤竟以死遐荒英魂飄何許願返托班行
思君真益友過我擬十籌思君不可作緘恨付春秋
君昔抗疏日計亦念至死正氣由乾坤有懷莫能止有

懷莫能止一死亦吾事

君氣蓋一世君窮直至骨身死無所歸妻孥無黔突遙
遙萬里道老父訝喪紼生子願聰明為君長壹鬱

送黃邦瑞還廣

抱病日煢煢君今又遠行斯文諒有味分手能無情柳
色纔沾白稍頭又轉青百年真轉轂何以慰平生

第一山和胡太守

一登第一山自覺衆山小日起海門騰雲連邊樹杳物

情隨運遷元化無時了一事類登山懷哉愧不少

月夜雲谷室聯句

今夕復何夕青燈共片心
聯詩乘酒興弄月傍花陰
清趣伴光景閒談斷古今
萬年不盡意要在自家尋

福州寄同志

去家十五日始入福唐州
宦心未汲汲鄉思奈悠悠
行亦諉雙老用何能一籌
途中每自問揩目看春秋

白鹿洞書院武侯靖節祠二首

金史卷一百一十五
卷一
洞中那得卧龍蹤因石興思蓋世公當日何人撐國事
洞中正爾卧真龍

靖節當年更隱憂欲為諸葛勢難籌眼中風物皆非舊
惟有黃花共晚秋

尹太守遺愛祠二首

山自蒼蒼水自深賢侯遺愛可勝吟至今一箇祠前月
猶照當年撫字心

饒他橐裏有千金難買邱民一點心今日泉山一片石

千年永作牧民箴

題何子完孝感詩

昊天罔極更何言
此事惟堪心自憐
滿卷新詩傳盛事
孝心當日豈其然

月梅

冬裏有春一味清
不因風雪不知名
問渠知己有誰在
月在天心人在庭

四一迂士卷

造物無言露却真
采真多是看花人
傍花隨柳前川樂
數百年來幾問津

送唐給事兩廣盤糧三首

使君自說未更事
足認使君自老成
年來頗訝當途客
欲將矯拂輔昇平

錢穀元非吾分外
握筭亦能助太平
學術多君非口耳
此行認取舊書生

感君遇我特從容
愧我疎庸百未通
宇宙之間大有事

煩君細問白沙翁

題鄭驛丞高岡九老圖二首

九老高岡恣勝遊，西來匹馬正追求。我今亦奉吾親去，

紫帽山頭境最幽。

紫帽吾泉名山也

擾擾塵途二十秋，歸心今已托東流。披圖喜見林間叟，
極目雲山興不收。

題畫舟中昂首者

閑棹扁舟出釣磯，涼風掀動數莖髭。江天一覽清如許，

誰解昂頭不語時

建溪戀竹

十月二十七日舟過建溪溪澗有竹數枝獨秀出其
倫類且近映溪流天光涵之上下玲瓏其景妙甚為
之停舟注玩不能去者久之舟中有王氏子自言能
畫因令圖其像共載焉詩以詠之

一見此君便有情況臨浮碧涵虛清行邊不忍拋君去
敬寫君真作伴行

飛鶴窺汀

一道風雲次第經
低徊有意在沙汀
丁寧莫為緘鱗計
且看滄浪清不清

遣興

舉天地間一正氣
誰能收之腔子裏
饒他身外無餘物
可受用的滿天地

讀書評寄鄭仲平

昨夜得一讀書訣
因風寄與吾人說
此身跨在雲霄上

俯照人間了毫末

又作文評

最愛前人一語真豪華落盡見真淳我今特與梅花約
桃李相逢各認春

題周世祥員外又是一別卷

丈夫出處亦何意遇流則行坎則止都門纔喜接春風
而今又是一別矣

哀天台黃亞卿二首

我入銓曹詢故事心香一瓣屬天台只今柱石廟堂者
多自當年推轂來

十年自占優閑地一札傳來歸夜臺不惜官階未極品
胷中生意尚無涯

輓溫方伯

一日蓋棺萬迹陳百年何事只憂貧輸公勘破人間事
獨執一清見古人

戲友人作墨鶴

天下皆知鶴質白怪君何意墨其身應嫌皦皦者易汙
直將此意悟時人更願無心待品物形形色色任天真

登清源次馬太守韻

行行行上北山巔始信人間別有天紅日當頭真可捧
白雲著袖似相牽細思田土千般物何似清源一滴泉
我欲便為栖隱計壯心未忍負青年

同黃石二生遊獅子巖和陳少參韻

一上獅峯四望低恍然身躡九霄梯風雲何意俱來會

蟲鳥無心自在啼靜對乾坤疑有話追思先哲愧留題
攜朋更向清源去去路相將莫遣迷

寄張廷實四首

夜窻諭蟲有引在京

六月初二夜青燈獨對紙窻外有蟲歛扣欲入者久
之頗悶其徒勞而不得其門也然苟納之則彼決然
赴死地矣不忍也口號以諭遣之云

爾蟲勿愴忙是乃燈灼光迷途殆爾福得路將自殃去

去效尺蠖朝來朝太陽

答林待用江湖念亦在京

每見江湖面便生霄漢心此心固未穩有病莫能任豈
惟吾身病心亦久清陰未須論世事歸去亦自鍼

因見江湖面轉得天地心天地心如何玄默行古今大
德自敦化川流本靜深百年等旦暮浮雲浪自歆留中
無活水安得商家霖

又和滕古甫見寄

平居喜誦古人句男子要為天下奇却愧年來三十四
正是濂溪作縣時

興動時亦嘗試吟一二詩第清於此段工夫甚缺
因詩伯扣及以請教耳詩雖不足言然區區心事
亦畧見於此昨承出處之問即是為復矣

題盛用陽師省卷

我覽師省字惕然中不寧悠悠老將至省身愧未能惟
昔有曾氏三省日有恆惟今有盛氏乃能上師曾師曾

固非難師曾亦豈易省身勿泥三隨地安着己柔者思
不隨剛者思不厲操術必求精濟人不謀利如此類推
之一息不容已此心貫萬端疑即一貫地人品夫何常
希曾亦曾矣小子嗟後時羨君早立志從今創脚跟行
遠必自邇

同年會

愛我同年會會中皆俊英入同奉天殿出或各專城譬
如一家子肺腑親弟兄或內而侍養或外以經營戮力

家事理所冀家和寧大夫始讀書便擬掇科名及其既
登名豈徒娛一生高科一時事千載有汗青富貴無所
樹風花不百齡端居時獨念宇宙事非輕皇天生我曹
豈我私聰明民胞并物與此責在書生昔年窻下業一
一皆典刑少者忌謀躁老者戒宦成願言各自愛年弟
復年兄

題雲谷室

山矗矗水簇簇白雲一片卧空谷卧空谷兮渾無心乘

風起兮應為霖

秋江送別

我愛秋江水一清
清徹底清波靜涵萬古心
清流一瀉直千里
君今從此發脩程
我聊贈此淡中味

和張大尹登最高峯每句上四字皆張詩

身在翠微兮我意登泰山之仲尼
眼空溟渤兮而亦收其吞天之勢
以助吾胸中之奇足躡青雲兮
遂揮長風而直上手扶紅日兮
光光明明於宇宙間是曰男兒

題商山四皓圖

鄒魯儒生落秦火諸公正在山中卧咸陽宮殿三月紅
諸公洞裏自春風馬上英雄饒善罵罵聲不到商山下
獨憐帝子意來虔一至漢廷力回天君不見李斯韓彭
皆殛醢秦皇漢帝亦安在當年商山四老翁至今人間
往往想丰采

洛江行送業師

我有先生學行獨不羣籍籍聲華動八閩我竊緒餘尚

一薦嗟吾先生兮始自貢途充國賓先生不見伊呂當年無科第自有功名萬古新困龍若際風雲便方潭勺水可騰身雖然先生早了環中趣否泰由來都是春此行如遇成都卜只問忠與孝不問屈與伸

題嚴陵送別卷

我未識江生而知生之名生年始十六文采動羣英乃父嚴州守其學見之行承家今有子賢路擬相仍吾友阮君浩楊欽及其兄與生同筆硯臨別莫為情千里馳

書來祈我贈詩聲詩以道情志不以供人事矧我非善
鳴何以塞君意雖然仁者贈言古有之要之其言不必
寄嘗聞君子學為己請贈此語當篇詩

畫圖景

崇山巍巍矗天起根盤不知幾十里萬木羣然山之巔
其中大者挺然長幹而繁枝明堂之棟應可擬遠山其
勢浸微茫雙峯直豎青雲裏丈人結廬擅山光閑來呼
童攜竹杖出門一徜徉翹然矯首青雲上意欲乘風至

帝旁一得至帝旁俯首瞰下方何處民窮何俗陋誰為
奸惡誰善良便應奮起今日凭欄手為茲民胞物與一
鋪張鋪張畢塞吾責然後歸去來兮舊山阿千駟萬鍾
奈爾何

題洪氏慈節堂

慈母人間非不多慈而節者能幾何洪母之慈似亦少
慈不徒愛愛而教一燈母子共分光母讀子讀影相弔
若其操節果何如為念夫家世業儒我今儻若差一念

萬卷家藏棄無餘天地一逆旅百年能幾許夫在則視
夫夫亡則視子但願子有立夫死猶不死妾身自分止
於此吁嗟兮洪君君母之賢世罕倫君今莫計位高下
只取胸中一物真我聞立身須以道善名是顯親汗青
豈必皆達者未計眼前屈與伸我亦為人子年來已度
三十春家貧自少事章句父祖力家百苦辛往年吾祖
已捐棄臨行猶願孫成器而今一第市童憐痛哉吾祖
安在矣祖母于今老色深念之中痛不能任雙親四目

僅一子況復暮景仍駸駸平生學力盡虛耳世事顛迷
無與比靜中自笑復自悲授之以政將何以每覽程朱
性理書踐履一意負心期古云三十骨骼成輕暴氣質
若未移顏淵三十德行立鄧禹三十功業畢我今三十
何為哉少日已去老將來父祖教育良可哀為感洪君
訴母苦客燈獨對淚如雨濡毫不管詩家數為君草草
傳心語

四哀詩

成化辛丑予自京師南還以病少留嚴州嚴之士就
予館問所疑者二十人其中楊氏二子銑欽最敏而
厲夜讀書率至四鼓日不復就寢予固期其成而常
戒其過也越數年欽領鄉薦而銑以病卒其親友皆
曰是過於苦學所致噫死生有命固已獨不曰守身
為大父母惟其疾之憂乎知所以為學者正不當爾
予今不得九原而責之矣獨念其正身刑家之化有
可言者銑病亟妻陳氏年二十四哭曰婦人喪夫其

初誰不云守節但不保其終耳且後日守節與否死者亦安知其能悉哉遂潛入室自縊死既蓋棺而夫目亦瞋遺一女欽育之未幾亦死欽哀痛久甚而不能忘也因求大司空鉞泉胡先生大司成雙溪劉先生為序為歌以存兄之名以傳嫂之節以伸已之恨予素不能詩文適覽二先生之作懷昔感今自訟其缺也不揆而續貂焉而乃追尤銑苦學之過者以欽此病猶或未盡祛也設有議予不宜用死者之事戒

生者則豈知予與欽相與之情哉失言之咎吾寧任之四哀之目見胡先生序云

一哀兄

古有二宋與二蘇我意二楊亦並驅銑也早逝欽也孤霜月哀哀孤雁呼銑也之逝何早乎旬日期盡萬里途
二哀兄即師

昔日小蘇與大蘇對床舊約老不踈生今此願不可攄青燈獨對讀遺書讀書之意竟何如立德立功澤八區

顯祖宗今大門閭伸兄遺志無使孤

三哀嫂死於貞烈

一死人生所必有佐逆偷生多白首往往仍出儒紳胄
到此昏顛不可究娟娟女兒閨中秀夫危未絕命先授
所決夫目得親覲青天白日九地透至性獨能全所受
寧知身名朽不朽嗟嗟末世多盜儒如此女兒真丈夫
若夫昔也曾師吾吾今以若為師乎

四哀姪女死於孩提

兄嫂相從九地遊獨遺孩女哭啾啾丁寧內人勤恤收
古有伯道若知否神理茫茫竟莫求掌中珠竟莫留
骨肉之恩竟莫酬此恨此恨百年何人瘳

雜著

管見上堂尊

治病者必求其致病之由然後藥力之施得其地而病
可起不然藥物千種所投泛漫無益於疾也近日彗星
之異天道玄遠固未可必知其果為人間何事而見然

以目前之事計之或者外寇之勢方張而吾所以禦之之具蕭然無一可仗天之意其為此耶愚謂此病瘡也非病源也數十年來上下玩安忽危紀綱日以廢弛紀綱日廢則士風日弊士風日弊則民力日屈民力日屈則國勢之危隱然無形歲復一歲如種在地萌動有期政使無邊場之警亦將有境內之憂故今日急務在朝廷之紀綱其次乃在邊境紀綱既振朝廷既正疆場自固外寇自服矣何謂紀綱不振愚不能周知四方事姑

以耳目所及者言之前歲清寧宮災皇上躬自脩省又
誠論羣臣各陳時務得失於是兩京科道官請以皇上
所得李廣所受朝士賄賂簿籍按行黜罰而更賢共理
此固亦脩省之大節目也而中外臣僚徇情為已曲相
彌縫竟使皆得無恙縱以人衆為疑亦當去其太甚奈
何公論所指曰某為姦之首而姦之首乃晏然朝端不
動矣曰某為佞之魁而佞之魁乃亦晏然朝端不動矣
至其所貶逐以應天變者僅言事御史胡獻一人耳即

此一事皇上所親目而切齒者臣下猶能巧計彌縫如此況於其他之可以游詞浪說眩惑於萬里君門之外者哉愚雖不能悉舉抑亦無待深言今日紀綱之廢弛一至於此士大夫風俗安得而不壞乎故一波動萬波隨謂罪皆計免何用惴惴懷刑謂功皆可以權得何必孜孜從事苟可以利其身赤子之填委溝壑不暇恤也苟可以利其家君父之大事所繫不暇顧也非但大姦大佞其實至愚至癡士風如此民力之屈尚忍言哉今

士民之貧者無立錫之地而宦官廁養至有宅舍擬於公侯金銀動以萬計此皆萬民膏血所萃也朝廷錙銖而取於民以為士馬之資者乃多充牣於庸將之家轉運於權倖之門於是兵弱不能衛民敵騎一至而邊人身家一掃空矣諸若此類愚亦不能盡言也意今日中國之虛實四裔亦當知之過半矣甚可懼也抑豈惟四裔為足虞前世草木間英雄往往乘間而起蓋士風弊則人才乏民力屈則兵力弱今日天下大勢皆然故謂

備禦之具無一可仗也其可不汲汲及時振吾紀綱以
揀藥之乎夫賢者必用不肖者必去有功必賞有罪必
罰此紀綱之大凡而朝廷之所以為朝廷者也嘗怪周
世宗以盖世之雄舉中原百郡之兵而伐南唐宜若無
事於再舉者而乘輿三駕首尾四年僅得江北而無全
功何則當時南唐僅能持其紀綱也如叛將朱元之妻
樞密使查文徽之女也文徽以寵臣故表乞全其女命
唐主批曰只誅朱元妻不殺查家女當時無有能以巧

計彌縫之者故國雖弱小猶能支吾大敵焉況以今日
堂堂天朝幅員餘萬里萬國無二尊曰兵曰財色色皆
可辦者惟紀綱朝振則國勢夕張矣不然地大不足恃
久安更可危也當宋元祐閒朝廷相司馬光而黜章惇
輩盡革熙豐弊政遼人聞之戒其邊吏曰中國相司馬
矣慎毋生事開邊隙以此觀之中國動息四裔無不知
者其可自廢吾所恃以為外域利哉更以周世宗高平
之戰觀之纔一按誅敗將何暉樊愛能等而兵勢遽赫

然改觀於俄頃之間自後百戰百勝率如破竹之勢則紀綱為國之命脉舉四肢貫百骸至重而不輕也明矣若夫紀綱根本所在則又在於人主之一心故心正則百事可正理明而後其心可正講學而後理可明學必正學毋徇於文藝之末而後有明理之功其指要則皆不外乎真氏大學衍義一書所言矣嗚呼此一書者真聖學之藏寶也人主不但當以日講經筵凡深宮燕居之際終食造次之頃皆當時時誦服不少遺忘務使其

言浸漬融化於一心之內而時出迭見於應物之間然後為有得而天下事皆可無俟多言矣不然安得事事而爭之旦旦而正之也哉此雖書生之常談其實不易之至理蓋不患外域之不服而患朝廷之不治不患萬事之不理而患君心之不明今日脩省之計伏惟大臣為國家先謀其大者生之言粗踈繁絮非敢擬為尊者所採以獻上也冀採其意而更為詞以獻上耳

又

今日兵備廢弛而邊境為尤甚其當掾為尤甚急蓋朝廷養兵本以制敵而今多役於權要之門朝廷給財本以養兵而今多落於權要之手氣勢不振於未戰之先威令不行於方戰之際功罪不明於既戰之後我之虛實既素為敵之所窺敵之虛聲益足為我之所畏今欲救之糧賞宜遣朝官以頒給不必悉關由於將領私役宜專委官以防察無事則寧恣之逸遊非親得雋於矢石之間者不得冒功宜從兵部報效試中者乃遣之一

或敗事於旗鼓之下者不得逃罪宜委方正官員紀功者并察之然其要在於將帥之人品不凡人品不凡則無事於防察以妨其權其機在於朝廷之紀綱振舉紀綱振舉則自將帥以下無不用命昔儂智高屢敗官軍宋一用狄青為總帥而南方遂平於旬月之內周世宗始敗於北漢立誅敗將何暉樊愛能等而兵遂無敵於天下唐羣帥討淮西之兵不用宦官監軍而用裴度臨督一舉而事定蓋同此將領同此士卒同此器械同此

卷一
糧賞亦在乎所以用之者何如耳此非經世之大本似亦救時之急務也謹具手啓以備采擇之萬一

自箴十四條

夫禮者賢愚貴賤之相休戚存亡之幾也

四肢百體身之膚殼也愚惡者所均有也心術言行身之精也思齊賢者所致力也於此而不致其力焉是無身也所存者膚殼焉而已矣多言何為

事理通達而心氣和平故能言品節詳明而德性堅定

故能立此語其誰不知誦之顧實得者難耳

人之真常見於飲食言動之末因仍造次之間故君子慎獨除邪之根也不然畢露矣

善愛其身者能以一生為萬載之業或一日而遺數百年之休不知自愛者以其聰明而際盛時操名器徒以就其一己之私而已矣所謂如入寶山空手回者也斯須不離乎正大則俗所謂吉者亦自不我離於斯須矣雖或不吉猶吉也斷乎必然也天地不能違者也

虛而一盡矣

最要靜愈靜愈靈

步步是理即步步天堂

蓋聞天地所以長久者以其氣運於內而不洩耳故仁者靜而壽天下事斷非浮躁者所能完也

分陰不惜學力不充當事臨疑口耳無所歸手足無所措

不學無術之弊至於赤族

立人之道曰仁與義一陰一陽也蓋凡接一切人應一切事皆當以仁為主至於仁之行不去處便有義以裁之矣故不窮

闕

許多當避嫌

闕

便以聖賢自擬王

應韶云此魯男子善學柳下惠之法也

書戒五條

吾置書亦甚難子孫宜念之善讀之則忠臣孝子碩德奇才之士皆自此出不負吾所以積書之意也不善讀

之或僅足謀祿利而已行業無聞物論不與書於汝竟何有哉吾墓土亦無輝矣

讀書貴乎以序而一一則可以致精精則有得而著已矣學不著已雖多何為

前輩云臯夔稷契何書可讀蓋此數公者雖未嘗讀書亦未嘗不窮理也窮理力行以致用學之為道何以加此吾嘗見有胃富萬卷筆下如流而實於其身不得幾字受用者則學其可不務擇術哉使臯契輩生今世吾

知其亦自不能已於讀書但其讀之得術耳

每讀書時輒有欲取而用之之心則亦何必多為也然既有是心則又自不容不多矣

書籍視他物尤須愛護小學書載顏氏家訓一段盡之矣其借人更須慎

與郭文博書

凡九段

承文博書拳拳欲得京師中好文字議論以為進學之助吾自到京一向匆匆未有可以答來意唯天官

冢宰王公舉朝士大夫皆以為方今第一等人吾頗辱其教愛時召至書軒賜之談論間及書史多有可發吾人志意者因憶數段錄寄

其一

皇上一日御經筵公侍講退召問予以大學心有所忿懷一章之旨予畧述舊聞以對公頗然之因曰今日當講先生於此數句各貼一先字謂事未至而心先有所忿懷則忿懷之行不得其正不知若無箇事有以激其

忿懷彼亦安得無端而生忿懷耶即是有所忿懷則忿
懷即著於其事矣又安得謂之無事而先忿懷耶子意
公此說儘精切苟非有得於體驗者宜道不到此故錄
之公且微笑當講先生未必有體驗身心之學也

其二

中庸道不遠人章自詩云伐柯伐柯至君子胡不慥慥
耳公亦疑只是一串意謂忠恕貫天下之道如何只把
作愛人一端之事吾故意朱子或先入於張子正蒙中

所載之三言也

其三

論語夫子之道忠恕而已矣公不以子舊說為然曰朱子之說亦未當也忠恕不宜分貼一貫曾子本意是謂忠恕一理貫天下之道而無餘者也故曰有一言而可以終身行之者其恕乎不知朱子若得聞此說以為何如亦可見此公之高也此方是真學問者乎

其四

孟子無為其所不為無欲其所不欲公亦以為上句是以義制事方外之功也下句是以禮制心直內之功也且曰盡之矣故曰如此而已矣

其五

人之有德慧術智者恆存乎疚疾公亦謂朱子所解恐未當蓋孟子本言凡人之無智慧者心常安泰不知憂患甚者安其危而利其菑惟有智慧之人則心便常存夫憂患故獨孤臣孽子身履乎逆境其操心也危其慮

患也深故能在邦必達在家必達行無不得也此說如何疑朱子解恆存為常由存字與由字義本相遠此亦可備一說也

其六

易經仁以行之公亦欲主當理無私之說謂愛字狹但寬以居之欲作寬緩以區處之此說未能無疑

其七

繫辭傳之說亦多未能合公本治易然於各經亦皆涉

獵尤熟於書詩常言我亦垂老方理會學問此亦可見學問之有益於人矣不然此老何以至今日尚拳拳也而公之德之才垂老而不衰者其有得於學問之力益信矣公今年七十四

其八

有一給事中奏請求天下之異才者事下吏部議公偶問予曰此事當何如議處予謝以淺陋不足與此等言論公固令述所聞於朋友間議論云何予對言異才尤

光岳所靳亘古不多得今日上之人雖未可絕望當世之無人然亦不可必求其人以實其科端教養精舉察而已矣至於天下之人尤宜自量不可因上之有求而妄應其選以遠大自勵而已矣況今天下人才大概以科目收盡矣此外所遺異才宜不可多得然清亦疑天下異才或不入於科目但恐亦須以試而知堯之於舜且歷試之必若求之於林野亦當先求於庶官之已試者也

其九

公又問今學者滿天下何故異才難得予對言是固有由也上之人所以養之者本未盡其道下之人又幸際時之昇平而售之急耳以生所見言之如生稍知章句訓詁人便舉而進之於學宮矣未幾作經義甫成篇便得補廩以為當然矣又未幾作三場文字纔可讀便迫迫期中舉中進士矣一中進士則官已到手或無暇於學或自以為無用學矣其仕而能學者無幾耳又或有

過時扞格之患蓋識見既淺踐履必薄規為必粗非所謂俟其熟而食之者也況自幼入小學而其所學者多非學做人之實事人才之不如古者以此故雖有異質者亦不能成異才生等躬坐此病今日雖知悔前之欠實蹈扞格之患矣公曰然吾兒子承裕今年二十三丙午年已中舉然吾未欲其急於仕且令靜覽羣書間閱世務冀他日得實用耳此一段似有益於吾輩故詳錄之

自警詩

自怪讀書廿餘年于今始解書中意往聞世俗語津津
總道讀書萬倍利吁嗟讀書只為利是亦商人而已矣
古昔聖賢所樹立明並日月照天地非義一毫絕胸中
方能充養浩然氣方能做得人間事彼志美衣兮沐猴
而冠耳司馬相公何等人巍巍勲德甘布被彼志美食
兮多是啖同類人能飽德膏粱薄簞瓢之中有餘味或
志宮室事華居寇公樓臺何地起丈夫以宇宙為家道

義是安形骸鄙或志田宅遺子孫賢而多財亦損志關
西所遺惟清白雲仍百代榮其裔此外或為燕居娛帷
薄之間尤所忌挺挺時賢楊繼宗之官能不攜其累吁
嗟復吁嗟世上榮枯無百年人生芳穢有千祀靜言思
之吾將哀若復不堅須早逝經云人心惟危道心惟微
今亟書此我孥誦之每旦出房用提吾耳庶幾不至羞
見爾

寄張廷實書

別吾廷實久矣得緝熙先生傾欵連日私以為天餉也翌旦且復西東敬就燈下索筆附上愚見一二代面論因便示正幸也向日所寄宋地官來華翰及次韻白沙老先生諸詩已領感佩感佩

人之一身亦微矣而充其能事直至於與天地參者子在齊聞韶三月不知肉味且看聖人是甚麼樣下工夫我輩尚何以自諉乎

每讀書時輒有欲取而用之之心則亦何必多為也然

既有此心則自不容不多矣

天地人物擲柄皆在靜上

道學乃造化元物也故靈

透地穿天木石眼經邦濟世水雲身

心當靜處天機現氣到完時鬼力隨

與姚德輝

古云三十年前好用工吾人年且三十矣將奈何昔項羽之救趙也既渡河沈船破釜持三日糧示士卒必死

無還心一戰勝之由此遂霸天下夫羽無足言也然能
決志用勇直於死中求生如此是亦學者所當師其一
節而未可以人廢也漳浦姚德輝從予遊將歸求予言
以警其惰予始為借粗論之會見陳進忠其亦以是語
之也

贈鄭溫卿宰鄒平

虛心順理毋激毋隨凡弊事且先去其太甚者使愛孚
於下而敬不失其上久之無不可為之事矣

凡能為百姓立久大之利者類非作色於旦夕者所能也

學者平居常患不得行道一旦得百里之邑而君之多有不樂就之意是皆欲一蹴到公卿者邪安在其為行道借曰今之作縣實難然賢公卿由此而出者多矣謂非進德之地其不可也夫

自古卿相與草木同腐或遺臭於世者何限而卓魯輩乃僅以一縣令名萬世其後來亦多至卿相蓋其初心

但知為縣令而不知為鄉相也

辱誤愛索贈言顧闇劣何以稱求益之盛心適歸來夜已深得惠東云發行在明早拙才匆遽不能成文草草如拾碎耳然何事於此吾溫鄉平昔所讀書多矣

廬墓文移一條

欽差提督學校江西等處提刑按察司副使蔡為廬墓以終喪服事據饒州府呈據本府儒學申據本學廩膳生員周鴻呈有母董氏於弘治十六年八月二十六日

病故至次年閏七月二十六日父又繼故鴻居喪三十
九箇月母喪雖終父服尚缺一十五箇月況廬墓未滿
二年痛哀之情不能自釋云云如蒙呈乞姑容在外廬
墓私補父服等因備呈到職參照先王制禮不容稍有
過不及之差周鴻母喪幾一載繼喪父則父母之哀一
時俱已作於其心而父母之服及一切喪事俱不容不
並行於外矣今乃欲於母喪二十七箇月之後復脩父
服如數則是方母服未滿之先其哀父之念能且遏之

使不行格之使有待乎宜無是理也蓋雖過厚之意實非中正之行方今三重昭昭文軌攸同自用自專常刑罔赦吾所期於鴻者要在為善於獨不求甚異於人使無名過其實乃為恰好不謂此舉乃涉迂怪也故為直之使知所勵

答洪元達書凡十三段

承元達書一通及問目三條覽之知學識進步至喜也前二條所問雖關理致却容易剖析末一條只是

度數之間然頗難分理自克忠到數日尚匆匆未暇
序答茲遇人便且就末條所問述其管見其前二條
稍暇亦當寄復以相質證有未安處便中希更不惜
駁難如此往復最有益也

其一

按孟子註云周七八月夏五六月則周正月為夏十一
月可知矣是乃所謂天正者也不然天正之正字何所
安著商正義亦宜然但愧覽閱未博不得其證耳

其二

易臨卦本義云或曰八月謂夏正八月於卦為觀其以
或曰冠之者界前說也前說是謂八箇月也非必以周
正言也然周正於遯卦之六月亦適謂之八月但文王
繫辭時未有周正耳

其三

春秋胡氏傳夏時冠周月之說雖非後學所敢輕議然
每讀之覺其曲折費力終未能愜然於心或意經所書

王正月者蓋謂時王之正月明其非夏時商時所謂正月耳為自夏商以前便已有三正迭用之事矣夏啓聲有扈之罪云怠棄三正可見矣故夫子於春秋有王正之文歟想王正二字亦有自來不必是孔子所立也

其四

夏時冠周月之說朱子當時又嘗疑之其說見春秋大全註云文定春秋說夫子以夏時冠月以周正紀事謂如公即位依舊是十一月只是孔子改作春正月某便

不敢信據今周禮有正月有正歲則周寔是元改作春
正月夫子所謂行夏之時只是為他不順欲改從建寅
耳愚謂據朱子說則周時之所謂春非夏時之所謂春
亦明矣此說與今胡傳不同

其五

正字既可推移而迭用春夏秋冬疑亦可隨之而遞遷
矣設使今日乍以十一月為正月人必怪之然久之人
亦必安然以為正月而不覺其異矣使今日乍以十一

月為春人又必怪之然久之又必安然以為春而不覺其異矣試以他事試之便亦可見但周正終不如夏時之善故夫子私以授顏子曰行夏之時若夫春秋所載皆周之事其從周似無疑孔子平日以生今世反古道者為何如人顧於尊周之書乃自犯之乎其告顏淵云云者謂若得邦家而制治則云云也胡氏以為此見諸行事之驗也愚未敢必其然儻如其說經文不用書王字矣而又何謂作春秋以尊王也

其六

胡氏所據有二說一曰前乎周者以丑為正其書始即位曰惟元祀十有二月則知月不易也是未知有三正迭用之故矣既改正便當改月數也又周詩七月篇亦有用夏正者七月流火九月授衣之類

其七

又其一曰後乎周者以亥為正其書始建國曰元年冬十月則知時不易也不知秦百事不師古顛倒錯繆何

可殫言其以亥月為正已是不識正字為何說矣則又安知改月以從時乎縱使改十月為正月亦一緊顛錯耳本無足深論也

其八

周以建子之月為歲首未盡善也孔子春秋不之改者據實而錄也秦以建亥之月為歲首又全無謂也朱子綱目不之改者亦據實而錄也周改正春秋於歲首則從而正月之秦無所謂改正者綱目於歲首則只從而

十月之此亦可證春秋於周月數未嘗改矣使胡氏脩
綱目亦將以夏時冠秦月而謂之春正月乎其曰冬十
月者又秦之不知師古而偶存古之一節者也然皆無
足深論

其九

又按莊二十八年冬經書大無麥禾胡傳曰麥熟於夏
禾成在秋而書於冬者有司於歲抄會計歲入之多寡
虛實也此說亦覺曲折愚意經所書之冬即夏時之秋

也其與夏麥併言省文例也若大無麥禾為指在倉廩者則大有年亦為指在倉廩者乎

其十

冬十月既云建亥則月數用夏正明矣此節無庸疑者自秦始皇二十六年以後至漢武帝太初元年以前俱用冬十月為歲首來問謂綱目於漢武未改朔之前一皆以夏正書之大槩然也但正月之正字為虛用耳

其十一

四時及各月數雖易而甲子未嘗易也故夏正月建寅
周三月亦建寅商正月建丑周二月亦建丑知此則知
如今年辛亥須管到建亥之月然後今年歲君始滿明
年壬子亦須管到建亥之月然後滿今俗以十二月交
春時為滿者非也所以千歲之日至必以甲子年甲子
月甲子日甲子時為厯元云

其十二

大抵周時雖以建子月為正月然天下終有呼為十一

月者餘倣此故左傳載僖公五年卜偃言滅虢之期曰其九月十月之交乎丙子旦日在尾月在箕鶉火中而下文即云冬十二月丙子朔滅虢林堯叟註云以星數推之乃夏之九月十月晦朔交會之日夏十月周之十二月也是周人固以周正紀事亦或有時用夏正矣蓋公家紀事必用周正者時王之制也私家紀事或用夏正者以所自来者遠也而亦可見夏時之正有非周正可及在人自有所不能置而不用者也予嘗謂凡古聖

賢所創法皆不可據今所便而任己見輕改之以周公之聖夜以繼日之思其改夏正一節分明改得未盡善況他人乎

其十三

三正迭用之說似踈而通且亦有據其試思之前二條得暇更欲寫出若他有疑儘可寄來商量此段可質恆謙亦可寄德馨仲殷二友議之

聖人心安於正論

昔有問於程子者曰形貌怠惰而心不慢可乎程子曰
安有箕踞而心不慢者愚嘗因是而得夫心迹相符之
說今觀魯論記夫子席不正不坐而先儒謝氏以聖人
心安於正釋之嗚呼心迹之相符也審矣蓋知人之箕
踞由於其心之慢則知聖人之席不正不坐由於其心
之安於正此其心迹相符之理正可以相形觀也愚故
特舉程子之言以發謝氏之意於以見學聖人者必自
治心始也是為論

劉項論

或謂劉項雖成敗不同要皆一時英雄也愚竊謂不然夫英雄以識見為先項氏當垓下之敗曰此天亡我非戰之罪且羽既以其亡為非戰之罪則自古之亡者如桀紂如幽厲可數也其果皆戰之罪乎而帝王之興也又果皆戰之功乎此則項氏之識見也項氏無論矣高帝大風之歌曰威加海內兮歸故鄉安得猛士兮守四方嗚呼王者之守四方也猛士而已乎此則漢高之識

見也雖其仁暴興廢不同要皆未到英雄本色也

岳飛班師

嗚呼岳公報國之志所以終不酬者果天耶人耶彼高宗秦檜無復論矣愚獨恨公之未知權也孝子之於親也從治命不從亂命公向者親受高宗肺腑之屬曰中興之事一以委卿矣今乃無故一日十二金字牌趣班師此非檜之為而誰檜為之而高宗聽之則亦亂命之類耳將在軍君命有所不受正謂此也苟利社稷專之

可矣公亦素好左氏獨不知斷以此義耶且其時萬世之悲憤既積吾胸中不世之機會又在吾目前朝廷乃無故入姦臣之言使我十年之功廢於一旦將不復以宗社為意父兄為念果何說也吾為國臣子誓赤心報國者也矧有成命在又民遮道慟哭者聲振野此亦天意也不以此時特出不得已之計脫然於尋常法度之外而有所敢為則終為姦臣所制縛而君父大事自我去矣又何言哉夫權姦可畏高宗之不足倚吾亦知之

矣獨不見前日宗留守乎人臣殺其身有益於君則為之況污其身以善其君乎當日之事愚以為正當用權以濟直馳表而南極陳時之難得易失不敢自墜于姦臣之計以負陛下肺腑之托而延吾國家萬世之辱隨舉鞭而北滅此而後朝食可幾也胡為乎竟以不得擅留一語自將哉夫徇君命之忠孰與為吾君報萬世不共戴天之讐之為忠也且高宗之所以忍與金和而急召公者亦惟懼吾力之未足以克而反速來禍耳今吾

自揆吾力必克無疑矣一舉而克之以還報吾君以為如何也既克之日安集之餘人民府庫籍上於朝將士卒伍亦約束以俟朝命吾特蓬頭跣足步至國門上表自劾其違命進兵之罪藉藁以待粉身碎骨萬死甘之吾赤心報國事畢矣儻必吾全則從此乞骸骨歸田里終身布衣蔬食自處於除名不叙之數曰後有違君命者雖能成功如此律若是亦足以存王法而白此心於吾君與天下來世矣蓋其轍行雖近類桓溫而心迹則

與溫有間不害為同行異情也此乃所謂權也夫權出於不得已者也若果不得已而猶不用權雖聖人無以濟事而聖人亦不立權之說以教天下萬世矣況公當日之事尤非可以一夕安者乎易有之曰大過之時大矣哉大過君子以獨立不懼意大過之時必有大過人之才而敢為大過人之事不膠於尋常故轍焉乃克有濟也是故以天下與人上世未有也而堯始行之君無道而伐之上世未有也而湯始行之君覆典刑而放之

自艾而復之上世未有也而伊尹始行之萬世之下終
不聞有以為名教罪人者使公當日而出此其要歸于
忠孝耳又非有改立放弑事也誰得而罪之嗟夫大丈夫
夫建大事苟非利己安能為尋常法度所制縛哉青天
白日萬世一日也所責備乎英雄者正在此耳今一解
而歸非惟前功盡棄其身之不免人固已豫知之矣嗚
呼公何不為趙氏九廟神主惜此去就乎此見可與權
者之難也嗚呼使公當日雪恥之志既酬而後為檜所

害愚亦為公甘之矣

臯陶執瞽瞍疑

桃應問曰舜為天子臯陶為士瞽瞍殺人則如之何孟子
曰執之而已矣執之之說愚猶未能釋然也夫舜君也
臯陶臣也臣之於君猶子之於父也瞽瞍寔舜之父則
亦臯陶之大父也不然亦非臯陶之屬而為臯陶者乃
但知有舜而不知有舜之父知有其父而不知有父之
父執之而已矣愚恐臯陶於此或有所不安也非惟不

能安其勢必至於使舜竊負以逃而舜之逃實臯陶驅之也則一時之天地神人其將委之誰乎為匹夫復讐固義也以一匹夫之故而遂廢天地神人所依歸之聖主於權衡得乎孔子曰父為子隱子為父隱直在其中矣舜父殺人臯陶必執而戮之舜亦聽其執而不禁焉如此乃得為直乎夫臯陶明刑以弼教也使天子之父殺人為之臣子者必執而甘心焉斯亦可以為教否乎凡此皆愚之所展轉於心而未能寔得聖賢之意者也

然則桃應之問也孟子答之當云何竊意孟子當時只可答云若舜為天子其父必無殺人之事也如此則絕不費辭而已足以倒桃應之問矣設桃應復曰瞽瞍向者尚欲殺舜矣何以謂其必無殺人之事也則將應之曰欲殺舜者未底豫之日也瞽瞍之未底豫也舜方如窮人之無所歸其肯安受堯之天下乎既受堯之天下則瞽瞍底豫矣瞽瞍既底豫又安有殺人之事也設桃應復曰瞽瞍未底豫舜嘗妻帝之二女而不告矣受堯

之天下又安知其必底豫而後可也則將應之曰不告而娶為無後也孟子固有是說矣然無後與無親其罪恐未易差等此又愚之所未能釋然者也且不得乎親不可以為人又可為天下君乎姑記其疑以俟達者

衛武公孟子孰優

邵國賢述某人問衛武公與孟子孰優清謂武公實踐之學疑孟子無以過其入為王卿士信無瑕可指矣然不聞有大建立於天下後世也使孟子得君計其規模

運用當有旋乾轉坤張皇皇極之理不但如斯而已也
抑六合之內上有天下有地中有人自伏羲神農黃帝
堯舜禹湯文武周公孔子顏曾思孟及周程張朱之數
聖賢則盡人道立皇極於中而上配天下配地更無所
與讓者也其餘羣哲則緊似紫微垣中諸有名大星宿
環拱乎帝座者也曰然則詩謂睿聖武公又何得為孟
子屈邪曰伯夷伊尹柳下惠獨不謂之聖乎但謂有功
德於一時則可孟子則有功德於萬世願學孔子而不

為夷尹者也故宰我謂夫子賢於堯舜是亦可以例矣

論詩

詩學在程朱當為後世主張了奈何亦混眾人作律詩
夫詩以言志耳豈必用平側對偶而後成其言哉既拘
對偶則有當言者以不諧聲律而已之又有不必言者
姑以湊押聲律矣是何趣味是何道理其始創為律詩
者決非有大人之志有不俗之見者也不可復以導士


廉生威銘

廉則威伸清風先人苟舉動得其當令之行也如神不然雖周公之才美與師尹之勢位匹夫或能勝予也譬之神龍失水抑予非不能論理而徒論其利害也論其利害斯尤可畏是故君子靜為本儉為貴李膺按部貪濁聞風而解佩亦自省事而無所係累矣

靜生明銘

靜則生明方寸之府天朗日晶坐照來物物無遁情毗女知廢陵母知興郭公知杞蘇老知荆為蜀山人為董

五經不可度思蓋人心本天地之至精惟節欲定神以
養之而不為物所鬬則自還其虛靈不然雲霧漲空雖
泰山在前對之如蒙矧無形之至理與未來之事功嗚
呼我憶曹爽人固已禽之胸中矣驚馬戀豆芻猶欲為
富家翁



虛齋集卷一